

四庫全書

子部

欽定四庫全書

子部

春明夢餘錄卷十四至十六

詳校官檢討_臣劉錫五

員外郎_臣牛稔文覆勘

覆校官中書_臣孫梅

校對官助教_臣胡予襄

謄錄監生_臣馬和龍

欽定四庫全書

春明夢餘錄卷十四

吏部左侍郎孫承澤撰

天壇

天壇在正陽門南之左永樂十八年建繚以垣墻周廻九里三十步初遵洪武合祀天地之制稱為天地壇後既分祀乃始專稱天壇按吳元年建園丘以冬至祀昊天上帝建方丘以夏至祀皇地祇及即位猶分祀如故

至洪武十年因風雨不時災異時見覽京房災異對始
定合祀禮採古明堂遺制即園丘舊壇作大祀殿壇而
屋之罷方丘而是歲即奉天殿行焉十二年殿成祀昊
天上帝皇地祇位南嚮仁祖配西嚮從祀丹墀四壇曰
大明曰夜明曰星辰又曰星辰內壇外二十壇曰五嶽
壇五中嶽壇以鍾山附曰五鎮壇五曰四海壇四曰四
瀆曰風雲雷雨曰山川曰太歲曰天下神祇曰歷代帝
王各壇一凡二十四壇大臣分獻因命太常每歲祭天

地于首春三陽交泰之時二十一年增修壇壝殿丹墀
中疊石為臺東西相向為壇四內壝外為壇二十亦東
西相向罷朝日夕月崇星之祭并罷太歲風雲雷雨嶽
鎮海瀆山川月將城隍歷代帝王之春祭建文元年撤
仁祖位奉太祖配永樂十八年京師大祀殿成規制如
南行禮如前儀增附天壽山於北嶽壇洪熙元年增文
皇帝配位太祖下嘉靖九年從給事中夏言之議遂於
大祀殿之南建圜丘為制三成祭時上帝南向太祖西

向俱一成上其從祀四壇東一壇大明西一壇夜明東
二壇二十八宿西二壇風雲雷雨俱二成上別建地祇
壇壇制一成面徑五丈九尺高九尺二成面徑九丈高
八尺一寸三成面徑十二丈高八尺一寸各成面輒用
一九七五陽數及周圍欄板柱子皆青色琉璃四出陛
各九級白石為之內壇圓牆九十七丈七尺五寸高八
尺一寸厚二尺七寸五分櫺星石門六正南三東西北
各一外壇方牆二百四丈八尺五寸高九尺一寸厚二

尺七寸櫺星門如前又外圍方牆為門四南曰昭亨東曰泰元西曰廣利北曰成貞內櫺星門南門外東南砌綠磁燎爐傍毛血池西南望燈臺長竿懸大燈外櫺星門南門外左設具服臺東門外建神庫神厨祭器庫宰牲亭北門外正北建泰神殿後改為皇穹宇藏上帝太祖之神版翼以兩廡藏從祀之神牌又西為鑾駕庫又西為犧牲所北為神樂觀北曰成貞門外為齋宮迤西為壇門壇稍北有舊天地壇在焉即大祀殿也嘉靖二

十二年改為大享殿殿後為皇乾殿以藏神版以歲孟春上辛日祀上帝于大享殿舉祈穀禮季秋行大享禮以二祖並配至郊祀專奉太祖配十年改以啓蟄日行祈穀禮于圜丘仍止奉太祖配十七年改昊天上帝稱皇天上帝是年欲倣明堂之制宗祀皇考以配上帝詔舉大享禮于元極寶殿奉睿宗獻皇帝配元極寶殿者大內欽安殿也殿在乾清宮垣後隆慶元年罷大享祈穀禮元極殿仍改為欽安殿圜丘泰元門東有崇霄壇

為制一成東為神庫嘉靖中時以孟夏後祭天禱雨祈穀壇成未行而罷

洪武元年二月勅禮官太常曰昔聖帝明王嚴于祭祀內致誠敬外致儀文朕膺天命首崇祀事顧草創之初典禮未備何以交神明致靈貺其博考郊禮以聞丞相李善長學士陶安太常卿胡惟庸等奏國有大祀曰圜丘曰方澤曰宗廟曰社稷若他諸中祀小祀各具沿革以進于是祀天圜丘以

大明夜明星辰太歲諸神從饗祭地方丘以嶽鎮
海瀆諸神從饗而前代太一感生五帝諸不經之
祀俱罷撰二丘樂章安等又言古者天子五冕祭
天地宗廟社稷諸神各有所用上以五冕禮太繁
惟天地宗廟服衮冕社稷等祀服通天冠絳紗袍
餘不用二年奉仁祖配時中都亦有南北丘焉五
年上親郊皇太子居守親王戎服從七年以大祀
獻終乃分獻未安學士詹同宋濂言請初獻奠玉

帛已分獻官即初獻亞獻亦如之上曰善八年從
學士樂韶鳳之請定大祀登壇脫舄禮九年令郊
社大事國有三年喪不廢十年春且郊感齋居陰
雨覽京房災異對始定合祀禮二十三年合祀禮
成上作大祀文并歌文略言朕聞太極之化天開
乎子地闢乎丑位極既定虛其中為寰中而人生
于寅人生滋多非聖莫馭天生君主為民立命洪
荒之時莫知誰始今載于書開天立極首興彝倫

者伏羲神農黃帝是也法三皇而守行者少昊顓
頊高辛唐虞其損益禮樂大備其文者夏商周也
下至秦漢以及于唐宋元嗚呼天性自然而常者
三綱五常也聖人度人情而措彝倫不逆其性務
從于善每聞昔君欽若昊天莫敢有怠朕即位以
來祀天饗地奉宗廟社稷當齋期必有風雨臨祭
乃歛每以為憂京房有言郊祀鬼神必天道雍和
神乃答若有飄風驟雨是為未善于是命三公度

土工部役梓人于南郊創大祀殿合享朕度古人
南郊祭天以陽生之月北郊祭地以陰生之月獨
以義起不知至陽祭之至陰之月至陰祭之至陽
之月于理可疑且掃地而祭其來甚遠尚質不華
令天地之享與人大異將人之饗亦執古不變乎
古則汙尊抔飲茹毛飲血巢居穴處今可行乎殆
必不然因定歲祭天地于首春三陽交泰之時合
祀天地前期致齋五日內二日以告仁祖三日正

齋風和日暖及夜升壇山川草木不搖江海不波
太陰中天神恍臨降故合祀宜也

嘉靖九年禮科給事中夏言請更郊祀疏臣按古
者祀天於南郊祭地於方澤兆於南郊瘞於北郊
順天地之宜審陰陽之位也至祖宗之配享諸壇
之從事合祀之不經乞勅多官集議以求至當彼
時皇后行親蠶禮于北郊祭先蠶氏詞臣霍韜言
親蠶為亂成法分郊為紊朝政其大禮論曰合祭

天地神陰陽也易曰陰陽不測之謂神並祀祖宗
宗達孝也禮曰祖文王而宗武王主日配月及于
星辰象從天也易曰本乎天者親上岳鎮海瀆象
從地也易曰本乎地者親下是故天地合德神化
出矣祖宗合祀孝德崇矣日月星辰麗於上河海
山嶽位於下倫類齊矣是故渾涵宇宙順序陰陽
幽贊神化明奠象類合祀之典顯且著焉非聖知
明于天地之性知鬼神之情狀其孰能與于此帝

怒其言御史鄧文憲亦言郊祀親蠶之義夏言未必是而霍韜未必非且天地分祀則父母異處親蠶郊外則內外失閑帝責憲附和遂定分祀之制朝日夕月之祭俱復夏言薦行太僕寺寺丞張鶚考定音樂時四郊並建兵部軍卒供役不足乃將馬價及缺官薪皂銀三十萬兩募役工作

萬歷三年十一月內閣臣張居正進郊禮圖冊曰謹按天地分祀至洪武十年聖祖乃定為合祀之

制每歲正月上辛日行禮于南郊大祀殿列聖遵
行百六十餘年至世宗皇帝始按周禮古文復分
建南北郊俱壇而不屋南郊以冬至北郊以夏至
行禮而二至之外復有孟春祈穀季秋大享歲凡
四焉隆慶改元詔廷臣議郊祀之禮時議者並請
罷祈穀大享復合祀天地于南郊先帝深惟三年
無改之義獨以祈穀大享在大內行禮不便從禮
官議罷之而分祀姑仍其舊蓋亦有待云爾夫禮

因時宜體乎人情者也高皇帝初制郊禮分祀十年矣而竟定于合享者良以古今異宜適時為順故舉以歲首人之始也卜以春初時之和也歲惟一出事之節也為屋而祭行之便也百六十餘年列聖相承莫之或易者豈非以其至當允協經久而可守乎今以冬至極寒而裸獻于星露之下夏至盛暑而駿奔于炎歊之中一歲之間六飛再駕以時以義斯為戾矣且成祖文皇帝再造宇宙功

同開創配享百餘年一朝而罷之于人情亦有大
不安者故世宗雖分建園方之制而中世以後竟
不親行雖肇舉大享之禮而歲時裡祀止於內殿
是斯禮之在當時已窒碍而難行矣況後世乎臣
等愚昧竊以為宜遵高皇帝之定制率循列聖之
攸行歲惟一舉合祀之禮而奉二祖並配斯于時
義允協于人情為順顧郊裡重典今且未敢輕議
謹稽新舊規制禮儀而畧述其槩以俟聖明從容

裁斷焉

中庸曰郊社之禮所以事上帝也朱子註郊祭天社祭地蓋郊之禮主祀上帝而統地祇也按郊特牲篇郊特牲而社稷大牢又云社所以神地之道也地載萬物天垂象取財於地取法於天是以尊天而親地也禮運篇夫政必本於天穀以降命命降於社之謂穀地又曰祭帝於郊所以定天位也祭社於國所以列地利也又云禮行於郊而百神

受職禮行於社而百貨可極及按泰誓云類于上帝宜于冢土召誥云用牲于郊牛二社于新邑牛一羊一豕一以上經傳對舉郊天社地之文最為明白及考祭法燔柴於泰壇祭天也瘞埋于泰折祭地也用騂犢埋少牢於泰昭祭時也以下六宗四坎壇之百神皆埋少牢此王者郊天而并祭地之文也周官大宗伯章祀天祀上帝祭地祀社稷獨司樂章有夏至方丘之文即祭法王為羣姓立

大社而王社乃宗廟之右社稷也別無北郊之名
夫天包乎地天尊而地卑固不可以並言南北郊
也禮云器用陶匏順天地之性也此亦郊天而並
祭地也草廬吳先生謂天地並尊似拂易傳天尊
地卑之義故著此論

國之大在祀而祀之大在郊自古禮殘缺後儒穿
鑿而五帝六天合祀之說迄無定論則以不深考
于經折衷于聖以準之也書曰肆類于上帝禋于

六宗望于山川徧于羣神又曰柴望秩于山川又
曰柴望大告武成曰類曰柴皆祀天之禮也然必
及于六宗山川羣神而不及后土則郊必兼社之
謂也易曰先王作樂崇德殷薦之上帝以配祖考
又曰聖人亨以享上帝周禮以禋祀祀昊天上帝
記曰郊社之禮所以事上帝也皆舉郊以見社也
家語孔子曰天子卜郊則受命于祖廟而作龜于
禰宮尊祖親考之義也卜之日王親立于澤宮以

聽誓命受教諫之義也既卜獻命庫門之內所以
戒百官也言郊之必卜也而不及社兼社也此唐
虞三代之制也儒者但見周禮有冬至祭圜丘夏
至祭方澤之文遂主分祀之說不知周禮一歲之
間祭天凡幾正月祈穀孟月大雩季秋明堂至日
圜丘此外有四時之祭則固合祭者矣前期十日
大宰帥執事而卜掌百官之誓戒太史與執事卜
日戒大宗伯詔相王之大禮祭之日大宗伯奉玉

大宰贊玉幣爵之事詩歌昊天有成命之章此其證也惟是周朔建子冬至圜丘適當獻歲不妨迎陽報天而後命及于地故其禮比合祭稍加崇重此惟行周禮之時則可耳乃其合祀之禮則未嘗廢散見諸經及孔子之言可據也使祭而必冬至也則何用卜之為故曰至敬不壇掃地而祭則又何必于圜丘方澤也以是而知周之未嘗不合祭也

由漢歷唐千餘年分祀者惟魏文帝之太和周武帝之建德隋高祖之開皇唐元宗之開元四祭而已至宋郊祀皆合祭其不合祭者惟元豐六年一郊元祐詔議北郊蘇軾主合祭從之者五人劉安世主分祭從之者四十人軾曰舜之受禪自上帝六宗山川羣神莫不畢告而獨不告地祇武王克商柴上帝望山川而獨畧地祇昊天有成命之詩郊祀天地終篇言天而不及地以是知祀上帝而

地祇在焉彼時羣臣方議合祀之非上以問輔臣
章惇曰北郊止可謂之社君子當不以人廢言夫
國之大事莫過于郊明太祖以開天之聖改分祀
而為合祀此千古卓見故行之百五十餘年風雨
調順民物康阜至嘉靖一改而明遂衰建議者夏
言也卒死于法抑太祖之靈弗歆乎至于太祖事
天之誠儀文純備千古僅見備錄之以為百世法
焉

慎配享

洪武元年十一月初三日冬至祀南郊上先詣太廟告曰歷代有天下者未嘗不以祖配天茲臣獨不敢者以臣功業猶有未就政治或有缺失懼有責焉況去年上天垂戒早暮兢惕恐無以承上帝好生之德故不敢輒奉以配惟祖神與天通恐上帝有問願以此言敷奏帝前善惡無隱惟上帝鑒之候南郊竣事臣當率百司恭詣殿庭告成大禮

以共享上帝之錫福越二年平慶陽羣臣復請乃
奉仁祖配

告祭

禮部崔亮奏按禮運曰禮行於郊則百神受職沈
括援唐制云有事上帝則百神皆預遣祭告惟太
廟則皇帝親行祭告今擬圜丘方丘大祀前期上
親告太廟仍遣使預告百神如祀圜丘則曰某年
某月日皇帝有事于圜丘咨爾百神以相祀事方

丘亦如之仍增天下神祇壇于圜丘之東方丘之
西其神主皆題曰天下神祇詔從之

齋期

上謂省臣曰朕每祭享天地百神惟伸吾感戴之
意禱祈福祉以佑生民未嘗敢自徼惠也且齋戒
所以致誠誠之至與不至神之格與不格皆係於
此故朕每致齋不敢有一毫懈惰今定齋戒之期
大祀以七日中祀以五日不無太久大抵人心久

則易怠怠心一萌反為不敬可止於臨祭齋戒三日務致精專庶幾可以感格著為令

祭器

崔亮奏按禮記郊祭器用陶匏瓦器尚質故也周禮遵人凡祭祀供簠簋之實疏曰外祀用瓦簋今祭祀用磁已合古意惟盤盂之屬與古之簠簋登豆制異今擬凡祭器皆用磁其式皆倣古之簠簋登豆惟遵以竹詔從之

省牲

上諭禮臣先賢有言見其生不忍見其死聞其聲不忍食其肉此人情之常今祭祀省牲於神壇甚邇揆之人心殊為未安於是亮奏考古省牲之儀遠神壇三百步上喜曰必如是而後可

脫舄

學士樂韶鳳奏曰禮侍坐於長者屨不上於堂解屨不敢當階就屨跪而舉之屏於側注屨賤空則

不敢陳於尊者之側長者在堂則脫於階下在室則上堂而不著入室也漢魏以後朝祭則跣襪惟蕭何劍履上殿宋南郊皇帝至南階脫舄升壇入廟脫舄升殿宋開寶通禮太廟饋食并褹袷皇帝至東階下解劍脫舄今議於郊祀廟享前期一日有司以席藉地設御幕於壇東南門外及設執事官之次門外西側祭日大駕臨壇入幕次脫舄升壇執事導駕讚禮讀祝并分獻陪祭官皆脫舄外

次升供事協律郎樂舞生跣襪就位畢降壇納帛
從之

戒飾

上詔中書言祀禮肇於聖王諸周旋上下進趨獻
酬之節慤懃至矣朕親循行其無乃失之瀆而過
飾乎過飾是不誠也孔子有云禘自既灌而往者
吾不欲觀之矣且人不誠者衆暫誠者有之永誠
者鮮已今措禮設儀而過飾能有終乎朕周旋神

所十有一年未見其當於是更儀殊式合祀天地
神祇飭中書下翰林院令儒臣紀焉

世宗更制

世宗改合祀而為分祀卜之太祖不吉謀之人言
不協將欲已之夏言持之獨力初問張璫璫備述
周禮及宋熙寧間陳襄蘇軾劉安世程頤所議分
合異同以對且言聖祖定制無敢輕議惟朝日夕
月之禮具載存心錄并祭祀禮儀若欲講求復舊

似無難者及上諭再議璵言聖祖為一代創業之主為子孫者億萬年所當遵守願以不愆不忘之心盡善繼善述之孝此其意雖在分祀然以祖制為言自是大臣告君之體及夏言二祖分配之說則力闢之矣曰郊祀之議聖見已定羣臣必將循默臣獨不忍無言皇上信以分配之說盡古禮乎大祀殿非明堂之位孟春祈穀非季秋大享之禮則未免有失於古也信以並配之說非今宜乎太

祖百有餘年之神座豈忍言撤文皇百有餘年配天之報豈忍言廢則未免有失於今也臣謂天地分祀宜從古禮祖宗並配宜從今制所謂酌古斟今繼志述事仰對祖宗願從容而裁酌之又曰天地者古今之天地分而祀之三代之盛典也臣敢不將順祖宗者一代之祖宗功德俱隆並配天地當代之定制孝子慈孫不可輕議臣安得無言至罷議之說又天地祖宗共為昭鑒今日月迭變風

靈飢饉救荒之政禮貴弛力為先請察臣言務求
可傳可繼之道外此非臣所知也固侃侃正論已
涓川范守已曰郊祀之議永嘉等前言為是而羣
議皆非也天地分祀古今正禮而祖宗訓制亦孝
子慈孫所當世守而不可改者謂祖制可變是以
祖宗為不足法矣謂祖宗為不足法則凡可以紛
亂舊章將無所不至也祖宗睿識神謨精思長慮
其所規畫協于至善者十之八九間有一二襲近

亡秦創制陋矣孝文固守其陋拒賈生之議而不
納匪真謙讓未遑也正以祖宗之法不可變耳迨
至武帝狹小漢制正統易服紛紛制作匪不力追
古始而漢家一代之制蕩然無存浸淫易世大覺
三啟卒致新莽之亂有由然也

元郊祀考

元初用其國俗拜天於日月山成宗大德六年建
壇於燕京合祭天地五方帝九年始立南郊專祀

昊天上帝泰定中又合祭然皆不親郊文宗至順
以後親郊者凡四惟祀昊天上帝其郊壇三成以
合陽奇之數每成高八尺一寸以合乾之九九上
成縱廣五丈中成十丈下成十五丈四陛陛十有
二級外設二壝內壝去壇二十五步外壝去內壝
五十四步各四門壇設于丙巳之地以就陽位外
垣南櫺星門三東西櫺星門各一中築園壇周圍
上下俱護以甃內壝外壝各高五尺壝四面各有

門三俱塗以赤祭時冕無旒服大裘而加袞搢圭執鎮圭皇太子侍祀服袞冕而執圭諸臣奉祀三獻官司徒大禮使七梁冠加籠巾貂蟬助奠以下諸執事官冠制如貂蟬無籠巾而有六梁四梁三梁二梁之異御史冠二梁加獬廌俱青羅服裳紱綬環並同笏以木

祈穀壇

祈穀壇大享殿即大祀殿也永樂十八年建合祀天地

於此其制十二楹中四楹飾以金餘施三采正中作石
臺設上帝皇祇神座於其上殿前為東西廡三十二楹
正南為大祀門六楹接以步廡與殿廡通殿後為庫六
楹以貯神御之物名曰天庫皆覆以黃琉璃其後大祀
殿易以青琉璃瓦壇之後樹以松栢外壝東南鑿池凡
二十區冬月伐冰藏凌陰以供夏秋祭祀之用悉如太
祖舊制至嘉靖二十一年撤大祀殿擬古明堂名曰大
享每春行祈穀禮隆慶元年禮官言先農之祭即祈穀

遺意宜罷祈穀於先農壇行事大享禮亦宜罷詔可後
至崇禎朝復舉行

祈穀紀

祈穀用孟春上辛禮也明初用二月上戊祭先農
不行祈穀即嘉靖亦一再舉而罷崇禎辛巳年正
月初五日上辛復舉行有旨祈穀除不散齋不出
宿於郊齋宮不朝亥時正三刻止升一燈外其恭
視壇位邊豆牲隻如園丘儀行奏祭著改於正月

初一日樂章奏舞命太常寺勤督樂舞生預為演習十五年壬午正月上辛即在朔日辛未禮部以朝賀不便疏請改十一日辛巳為中辛得旨改中辛日行禮

崇禎壬午上親行祈穀禮記壬午正月初五日上常服詣太廟以親詣南郊視牲預告於太祖及列祖神御前仍欽遣禮部左侍郎王錫衮右侍郎蔣德璟詹事黃景昉充上香導引官初六日遣勲臣

等恭代視牲初七日上御皇極殿太常寺奏祭祀
初八日為始致齋三日初八日質明上常服乘輿
詣太廟門西降輿至廟門幄次內具祭服詣太廟
告請太祖配神行禮畢出至幄次易皮弁服回御
皇極殿太常寺光祿寺官奏省牲初九日大雪上
親享太廟禮畢臣璟即偕王黃二公冒雪出南郊
宿太常別院是日午後太常官捧蒼玉帛匣香盒
同神輿亭進于皇極殿內司禮監官捧帛同安設

於御案之北初十日質明上御皇極殿太常卿捧
祝版從中左門進安於御案上上親填御名訖太
常卿捧安於輿中司禮監官進玉帛上親裝於各
匣內安訖太常寺官以次奉安輿中太常卿隨捧
香盒於香亭右跪上三上香行一拜三叩頭禮畢
轉於東西向立錦衣衛官旗入擡輿亭從中門出
太常卿隨詣大享殿神庫奉安上遂詣太廟以親
詣南郊行祈穀禮預告於太祖及列祖神御前行

禮畢還宮是日早璟偕王黃二公及太常少卿高倬具吉服冒雪至大享殿皇乾殿演禮即在北天門內候駕至未時錦衣衛官備法駕設板輿於皇極門下正中上常服御皇極門太常卿奏請聖駕詣南郊行祈穀禮於大享殿上陞輿掌衛官跪奏起輿從午門端門承天門大明門正陽門詣南郊壇內西天門至神路迤西臣璟偕王黃二公及高少卿面駕序立行叩頭禮畢分兩旁候上降輿臣

璟等導上從大享南門左門入太常卿党崇雅跪
迎同導上至丹陛太常卿導上至大享殿左門入
恭視神位臣璟等先詣東陛前候上視神位畢太
常卿導上從東陛下臣璟等同導上至神庫視籩
豆至神厨視牲太常卿逐一奏畢復同臣璟等導
上仍從大享南門出迤西陛輿至齋宮陪祀各官
免朝叅是日雪勢特猛導引往還可數千武而神
庫門路甚深滑上亦徐行俯體諸臣便步趨也至

一更時臣璟等三人具祭服詣皇乾殿行一拜三叩頭禮王公上香請神璟與黃公導引太常官以次捧昊天上帝正位高皇帝配位神版詣大享殿奉安訖臣等三人即趨至大次候駕亥時一燈起萬燈齊明燦如列星上常服乘輿冒大雪從齋宮東門出至神路之西降輿導駕官導上至大次德璟三人及太常卿復命上秉圭曰朕知道了少頃具祭服出導駕官導從大享南門左門入行祈穀

禮用十二拜如大祀儀祭畢上出至大次易常服
不回齋宮即從西天門還至太廟叅謁如前儀畢
還宮禮部侍郎蔣德璟謹紀

按月令孟春天子以元日祈穀于上帝註謂以上
辛郊祭天春秋傳曰啟蟄而郊郊而後耕郊特牲
曰郊用辛註凡為人君當齋戒自新盧植蔡邕曰
郊天是陽故用日耕藉是陰故用辰孔穎達曰甲
乙丙丁等謂之日子丑寅卯等謂之辰元者善也

元日郊用辛元辰耕用亥黃道周曰春日甲乙則未知其果上辛也明初以冬至祀天圜丘夏至祀地方澤洪武十年罷之而止以正月上辛合祀天地于大祀殿并日月星辰山川等神俱在焉其禮甚省其敬甚專嘉靖九年罷之而分為圜丘方澤朝日夕月四郊其大祀殿則以孟春上辛祈穀十年又改啟蟄日祈穀二十四年又改大祀殿為大享殿然祈穀禮不復行崇禎十四年復行祈穀禮

用上辛十五年用中辛云

齋宮附

齋宮在圜丘之西前正殿後寢殿傍有浴室四圍牆垣以深池環之皇帝親祀散齋四日致齋三日於齋宮駕至南郊昭享門降輿至內壝恭視壇位又入神庫視籩豆至神厨視牲畢出昭享門至齋宮各官早朝午朝俱賜飯傳曰祭之日披袞以象天戴冕藻十有二旒則天數也乘素車貴其質也旂十有二旒龍章而設日月以

象天也天垂象聖人則之郊所以明天道也

周官掌次王大旅上帝則張大次小次大次在壇
壝外初往所居止也小次在壇側初獻後退俟之
處也按宋營青城幄殿即周之大次也又於東壝
門外設更衣殿即周之小次也其制皆用帛絞縛
元豐中議禮局言每歲青城費縑布三十餘萬乞
如青城創制齋宮使一勞永逸時未及行哲宗始
建齋宮南渡後庶事草創復絞縛以備制明洪武

二年詔築齋官于園丘側永樂因之

郊壇門外每祀設大次駕臨壇入幕次脫舄升壇其升壇執事導駕贊禮讀祝並分獻陪祭官皆脫舄于外以次升壇供事協律郎樂舞生依前跣襪就位祭畢降壇納舄嘉靖中享廟皇后助祭遂罷脫舄禮後不復行齋官東西懸大和鐘每郊祀候駕起則鐘聲作登壇則止禮畢升駕又聲之

洪武中禮部尚書崔亮奏宋祥符九年議南郊壇

祀天或值雨雪則就太尉齋所望祭元經世大典
載社稷壇壝外垣之內北垣之下亦嘗建屋七間
南望二壇以備風雨曰望祀堂請依此制於園丘
方丘壇南皆建殿九間社稷壇北建殿七間遇風
雨則於此望祭焉上從之

嘉靖中上以舊存齋宮在園丘北是踞視園丘也
欲改建于丘之東南夏言言更起齋宮于園丘之
旁似于古人掃地之義未為允愜且秦漢以來並

無營室者正謂質誠尊天不自崇樹以明謙恭肅敬之旨故惟大次之設為合古典陛下前日考據精密豈今偶未之思耶願寢其議仰荅太靈報聞

神樂觀

神樂觀在天壇內之西設提點知觀教習樂舞生內有太和殿遇祭則先期演樂于此洪武初御製圜丘方澤分祀樂章後定合祀更撰合祀樂章禮成歌九章已病音樂之未復古也詔尚書詹同尚書陶凱與協律郎冷

謙定雅樂而學士宋濂為樂章著令凡祀有樂樂四等
曰九奏曰八奏曰七奏曰六奏樂有歌有舞歌堂上舞
堂下舞皆八佾有文有武郊廟皆奏中和韶樂太常領
之協律郎司樂考協之凡樂淫聲過聲凶聲慢聲若舞
失節者皆有糾禁凡樂器不徙凡園陵之祭無樂

洪武十二年十二月諭神樂觀云開基守業必勤
政為先趨事赴公非信誠必責傳不云乎國之大
事在祀與戎曩古哲王謹斯二事而上帝皇祇悅

賜天下安和生民康泰朕起寒微而君宇內法古
之道依時以奉上下神祇其於祀神之道若或不
潔則非為生民以祈福而保已命也昔劉康公成
肅公會晉侯伐秦祭於社稷之神然後興師當祭
之時畢則有受胙之禮其受之時必思洋洋乎其
在上而穆穆然或左而或右委心慎敬而受之則
祥故敬勝怠者吉怠勝敬者滅所以成肅公受胙
之時起慢神不恭之貌因伐秦而卒是以知敬慎

必有動作禮義威儀之則以定命也於斯祀神之道能者養之以福不能者敗之以禍是故君子勤禮小人盡力勤禮莫如致敬盡力莫如敦篤敬在養神篤在守業朕觀古人之敬神也若是其驗禍福亦若是斯可謂無神而不信乎可謂佞神而祈福乎二者皆不可惟敬之以禮而已朕設神樂觀備樂以享上下神祇所以撥錢糧若干以供樂舞生非倣前代帝王求長生之法而施之然長生之

道世有之不過修心清淨脫離幻化速疾去來使
無艱阻是其機也於戲昔殷周之父老何存漢唐
之耆宿安在果長生之道乎朕設神樂觀以備樂
碑之于觀以示後世其觀主不潔樂生不精贍生
不足以此觀之不但君不勤于祀事其朝臣觀主
必也亦然若君勤于祀事朝臣觀主無一體之敬
則國有常憲故茲勒石想宜知悉

洪武六年上以祭祀還宮宜用樂舞生前導命翰

林儒臣撰樂章以致敬慎鑒戒之意後世樂章惟
聞頌美無古意矣嘗謂諷諫則使人惕然有警若
頌美之詞使人聞之意怠而自恃之心生蓋自恃
者日驕自警者日強朕意如此卿等其撰述毋有
所避于是儒臣承旨撰神降祥神祝酣酒色荒禽
荒諸曲凡三十九章曰回鑾樂歌舞其詞皆存規
戒其樂舞分為八隊皆八人禮部因其制以上命
工肄習之洪武二年有旨教胡太常做個牌子漆

的如法將園丘方澤社稷宗廟先農風雨雷師馬
祖凡一應祭祀時月日期明白開寫于牌上掛在
這東耳房前我時常看都要知道欽此又銅人制
亦創自高皇也洪武十二年上命禮部尚書陶凱
等曰經言鬼神無常享享于克誠人謹方寸于此
而能格神明于彼由至誠也然人心操舍無常必
有所警而後無所放耳乃命禮部鑄銅人高一尺
有五寸手執簡書曰齋戒三日凡致齋之期則致

朕前庶朕心有所警省而不敢放也又令各衙門
置木齋牌刻其文曰各有常憲神有監焉遇祭祀
必設洪武中諭曰石音固難和然以人聲為主神
人悅和即八音諧和時起居注熊鼎進曰樂音不
在外求在人君一心心和則天地之氣和樂無不
和矣嘉靖既更定祀典中允廖道南請稽古樂章
以裨盛典上曰考定律呂必真知者乃可詔發內
府所藏金玉銅石鐘磬于神樂觀考正音律仍令

科道官各舉所知諳曉音律之人以聞夏言薦行
太僕丞張鶚曉暢律呂鶚臨清人時在告應詔至
欲定元聲復古樂併進所著樂書二部一曰大成
樂舞圖譜自琴瑟以下諸樂逐一作譜一曰古雅
心談以十二圖象十二律律圖各有說乃下禮部
議覆上曰音樂即為更定勿誤享祀之用乃譜定
帝社稷樂歌以進遼州同知姚文察進所著樂書
四聖圖解二卷樂記補說二卷律呂新書補註一

卷興樂要論三卷因請興正樂以薦上帝祀祖考
教皇太子章下禮部覆言文察所進樂書其于古
今原委類多前人所未發者且於人聲中考定五
音以為制律候氣之本法似徑截深合虞書言志
永言依永和聲之旨宜令文察及太常知音律者
選能歌樂舞生百餘人協同肄習本部及該寺正
官以時按試候聲律諧協吹律候氣咸有應驗方
授官與張鷟同事從之

辨大司樂之誤

按周禮大司樂云凡樂園鐘為宮黃鐘為角太簇為徵姑洗為羽雷鼓雷鼗孤竹之管雲和之琴瑟雲門之舞冬日至於地上之圜丘奏之若樂六變則天神皆降可得而禮矣凡樂函鐘為宮太簇為角姑洗為徵南呂為羽靈鼓靈鼗孫竹之管空桑之琴瑟咸池之舞夏日至於澤中之方丘奏之若樂八變則地示皆出可得而禮矣元儒吳澄曰此

文不惟不經仍自相背戾既曰大合樂以致鬼神
示而其下則止用黃鐘大呂雲門祀天止用太簇
應鐘咸池祭地如是則六律六同五聲八音六舞
各自為用不得謂之大合樂矣况周家祭祀已行
之迹莫詳於詩之頌今攷昊天有成命之詩郊祀
天地是天地無分祀之文攷般之詩望祀四嶽河
海是四望與山川無異祭之文攷雝之詩禘祖而
其末則曰既右烈考亦右文母是妣與祖亦無各

祭之文攷周頌之詩盡是祭祀之詞其言作樂未聞有分樂而祀之之說亦未聞用歷代之樂以分祀之禮此甚不足信又曰既言六樂者文之以五聲播之以八音是六樂之作五聲八音並用之矣而其下則禮天神地示人鬼於五聲皆止用其四於八音止用其三使其果如此則聲音不備樂何自而作况攷之於詩有瞽作樂而合乎祖其間用鞀磬祝敔簫管等樂於祭宗廟之際固亦兼用竹

草木石之音矣孰謂去此而不用乎既曰凡六樂者一變至六變合六樂而言之至於七變八變九變則餘三變又不與焉況樂所以象德而六樂之致鬼神示不知何分而象德耶

邱文莊濬曰按分祭天地之說始見於周禮大司樂他經典所不載也非獨他經典所不載雖周禮亦無之惟大宗伯以玉作六器以蒼璧禮天黃琮禮地及典瑞四圭有邸以祀天旅上帝兩圭有邸

以祀地旅四望兩處分言天地然不言其地與時
其言冬至祀天夏至祀地祀天於圜丘祀地於方
丘惟於大司樂見之夫大宗伯之職在掌邦禮禮
之大者吉禮也禮莫重於祭祀莫大於天地然於
大宗伯所掌之三大禮吉禮十有二之中上言昊天
上帝而不及后土地祇乃至於作器之時始言
之可見其所行之禮則一而所用以禮神者其器
則有兩也況於司服掌王之吉服止有祀昊天

帝則服大裘而冕之文無所謂后土地祇之服由是觀之合祭天地其神有兩而主祭惟以一人可見矣惟其神之兩故兩其器或以蒼璧或以黃琮或四圭有邸或兩圭有邸惟其祭之一故主祭之人所服之服則一而已然則大司樂之言非歟曰先儒固謂周禮非盡出周公況其所論樂律自相背戾吳澄謂其不經不足信非無徵之言也夫其所論之樂既不足信則所論之禮又烏可深信哉

在大司樂分樂始言天神地祇而未及二至及論樂之變而後有二至方圓丘之說意蓋謂分樂律以屬陰陽故於是日奏之始合樂也故曰若樂六變若樂八變則天神可降地祇可出然後天地可得而禮是合樂而非大亨也在家宗人以二至日致人鬼物鬼則為祈禴而行非大亨之禮明矣至漢時天子以二至御前殿會八能之士陳八音聽樂均度則猶大司樂之遺意今乃斷以二至日為

分祀天地蓋未嘗詳考周官禮樂之文

唐楊收曰樂亡久矣上古祀天地宗廟皆不用商
周人歌大呂舞雲門以祀天神歌太簇舞咸池以
祀地祇大呂黃鐘之合陽聲之首而雲門黃帝樂
也咸池堯樂也不敢用黃鐘而以太簇次之然則
祭天神者圜鐘為宮黃鐘為角太簇為徵姑洗為
羽祭地示者函鐘為宮太簇為角姑洗為徵南呂
為羽訖不用商及二少漢祭天則用商而宗廟不

用謂鬼神畏商之剛西京諸儒惑圜鐘函鐘之說
故其自受命郊祀宗廟唯用黃鐘一均章帝時太
常丞鮑業始旋十二宮夫旋宮以七聲為均均言
韻也古無韻字猶言一韻聲也始以某律為宮某
律為商某律為角為徵為羽某律少宮少徵亦曰
變曰比一均成則五聲為之節族此旋宮也蓋樂
本於五音能從五音而求之則樂之理思過半矣
宋沈括云宗廟之樂宮先次角又次徵又次羽宮

角徵羽相次者人樂之叙也故以之求人鬼圓丘
方澤之樂皆以角為先其次徵又次宮又次羽始
于角木木生火火生土土生水木火土水相次者
天地之叙故以之禮天地聲之不用商先儒以為
惡殺黃鐘之太簇函鐘之南呂皆商也是未嘗不
用特不用商中聲耳天之氣始于子故先以黃鐘
天之功畢於三月故終之以姑洗地之功見于正
月故先之以太簇畢于八月故終之以南呂幽陰

之氣鍾于北方人之所歸鬼之所藏也故先之以黃鐘終之以應鐘

明初議樂者以唐人趙慎之言謂周禮天神地示人鬼俱不用商者周以木德王避其所尅也故慎于唐請加商調去角調且言宋與明俱以火德王當去羽不當去商相尅之說近于術數終以揚收之言為正且鄭康成曰祭尚柔而商堅剛故不用焉其言固不始于收也

西垣筆記

崇禎十五年二月禮部奏上諭太常寺有神樂觀
及給賜淨衣取其精潔今郊廟祭樂亦多疎澁如
琴瑟並無指法舞容尤乖古制宜訪求知樂之人
細加叅究因及鄭世子所進樂書及原任禮部尚
書黃汝良樂律考大要以黃鍾為主仰見皇上留
心上理於禮樂精微無不洞悉臣等謹察得黃鍾
候氣實為律歷之本而自漢唐以來或為三寸九

分或為九寸其說不同前議歷法時臣等以古葭
灰候氣之法令欽天監與新局並試皆不甚曉至
樂舞生則琴瑟搏拊尚未能辨矧黃鐘乎周時以
舞教國子令大胥正舞位小胥正舞列節八音而
行八風蓋五行之義皆寓於其中至漢大樂律則
卑者之子不得舞宗廟之酎凡除吏二千石至六
百石關內侯至大夫之適子取為舞生其教之豫
而選之精如此以能發揚功德孚格天人而今皆

伶人下賤為之去古實遠宜令太常倣周漢意選
舞士不得仍以倡優充數仍將律書正聲所纂舞
圖舞節重加翻習庶足復三代之舊又輔臣奏廟
堂上不宜用教坊樂聖意亦以為然察會典凡祭
祀用太常寺樂舞凡朝會宴享等禮用教坊司奉
鑾而相沿既久疎舛成習所當嚴行申飭至古者
房中之樂歌闋睢諸詩燕射之樂歌鹿鳴諸詩笙
奏繇庚諸詩即漢人樂府亦特為古雅當時音容

必有可觀自唐始分太常與教坊為二實鄭聲亂雅之始惜古樂殘缺未易頓議亦宜訪求知樂之人徐加訂定以副聖天子復古致治盛心

犧牲所

犧牲所建於神樂觀之南初為神牲所設千戶並軍人專管牧養其牲正房十一間中五間為大祀牲房即正牛房左三間為太廟牲房右三間為社稷牲房前為儀門又前為大門門西南遇視牲之日設小次大門東連

房十二間西連房十二間前為瞭牲亭三間東西有角門東角門北為北羊房五間山羊房五間又北為煖屋滌牲房五間倉五間大庫一間西角門北為北羊房五間山羊房五間穀倉二間看牲房一間黃豆倉一間官廳三間正牛房之北為官解十二間東為兔房三間又東為鹿房七間鹿房前亦為曬晾亭三間又前為石柵欄官解西為便門門西又為官解四間又西為小倉三間東羊房後為新牛房後牛房十間餽中祀小祀牛正

北為神祠西羊房後正南房五間為大祀猪圈西房十間為中祀小祀猪圈北有井又草廩東北為司牲祠

周禮充人掌繫祭祀之牲拴繫於牢芻之三月封人凡祭祀飾其牛牲設其楅衡置其綏共其水橐飾謂刷治潔清之也楅衡所以持牛令不得舐觸楅設於角衡設于鼻綏繩也所以繫牛者公羊傳曰養牲必有二帝牛不吉以為稷牛帝牛必在滌三月稷牛惟具滌牛宮也謂之滌者蕩滌牢中使

潔清也三牢各主一月其一月在外牢一月在中牢一月在明牢必三月者取一時氣成以充其天性也牢閑也繫而飼之所以防其損傷也歷代以來並廩犧局滌潔唐令凡大祀養牲在滌九旬不得箠扑傷損死則瘞之病則易之凡牲方色難備則代以純色凡養牲必有副省牲而犢鳴則免之而用副宋元大祀牲牢入滌別養一依唐制

神牲所設官二人牧養神牲祀前三月付廩犧令

滌治如法其中祀滌三十日小祀滌十日者亦如之

凡郊廟犧牲已在滌者或有傷則出之死則埋之
其有疾者亦養于別所待其肥腠以備小祀中祀
之用若未及滌或有傷疾者歸所司別用景泰四
年令禮部鑄造牲字牢字火印各一會同太常寺
及御史印記各處解到大祀牛羊

舊制歲以十二月朔旦駕親臨閱以後每夕輪一

大臣繼視之蓋自五府及吏戶禮兵工五部通政
翰林堂上官之不司刑者皆與焉凡兔房鹿檻羊
棧牛枋猪圈周行歷視出入皆騎卒火甲人等護
衛每夕鐘定人靜乃出至中宵始回城門啟鑰以
入次蚤復命用騎卒自宣德年始

春明夢餘錄卷十四

欽定四庫全書

春明夢餘錄卷十五

吏部左侍郎孫承澤撰

山川壇

山川壇在正陽門南之右永樂十八年建繚以垣墻周迴六里洪武三年建山川壇于天地壇之西正殿七壇曰太歲曰風雲雷雨曰五嶽曰四鎮曰四海曰四瀆曰鍾山之神兩廡從祀六壇左京畿山川夏冬季月將右

都城隍春秋季月將二十一年各設壇於大祀殿以孟春從祀遂于山川壇惟仲秋一祭永樂建壇北京一如其制進祀天壽山于鍾山下嘉靖十一年即山川壇為天神地祇二壇以仲秋中旬致祭別建太歲壇專祀太歲東廡為春秋月將西廡為夏冬月將各二壇前為拜殿宰牲亭南為川井即山川壇舊井有龍蟄其中壇西南有先農壇東旗纛廟壇南耜田在焉十年定太歲月將祭期歲于孟春享廟歲暮禘祭之日遣官行禮隆慶

元年禮官議天神地祇既從祀南北郊仲秋不宜復有神祇壇之祭罷之而太歲之祭如故

神祇壇

神祇壇方廣五丈高四尺五寸五分四出陛各九級墮墻方二十四丈高五尺五寸厚二尺五寸櫺星門六正南三東西北各一內設雲形青白石龕四于壇北各高九尺二寸五分

地祇壇

地祇壇面濶十丈進深六丈高四尺四出陛各六級墻方二十四丈高五尺五寸厚二尺四寸櫺星門亦如神壇內設青白石龕山形三水形二於壇北各高八尺二寸左後位山水形各一於壇東右後位山水形各一於壇西各高七尺六寸

太歲壇

太歲壇在山川壇內中為太歲壇東西兩廡南為拜殿殿之東南砌燎爐殿之西為神庫神厨宰牲亭亭南為

川井外四門東門外為齋官鑾駕庫外為東天門

洪武二年以太歲風雲雷雨及嶽鎮海瀆山川城
隍諸神止合祀於城南諸神享祀之所未有壇壝
等祀非隆敬神祇之道命禮官考古制以聞至是
禮官奏太歲者十二辰之神按說文歲字從步從
戌木星一歲行一次歷十二辰而一周天若步然
也自子至巳為陽自午至亥為陰所謂太歲十二
辰也陰陽家說又有十二月將十二時所直之神

若天乙天罡太乙功曹太冲之類雖不經見歷代
用之唐宋不載祀典元每有大興作祭太歲月將
日直時直於太史院若風雨師之祀則見於周官
秦漢隋唐亦皆有祭天寶中增雷師於雨師之次
因升風雨雷為中祀宋元因之又按嶽鎮海瀆之
祀虞舜以四仲月巡狩而祭四嶽東嶽曰泰山四
嶽之宗也故文曰岱宗南嶽曰衡山西嶽曰華山
北嶽曰恒山而未言五嶽王制曰天子祭天下名

山大川五嶽四瀆始有五嶽之稱蓋以中嶽嵩山並列又周官小宗伯兆四望於四郊鄭元以四望為四嶽四瀆四瀆者江河淮濟也四鎮者東曰沂山西曰吳山南曰會稽北曰醫巫閭詩又曰巡狩而祀四嶽河海則又有四海之祭蓋天子方望之祀無所不通而嶽鎮海瀆在諸侯封內諸侯亦各以其方祀之秦罷封建嶽瀆皆領於祠官及漢復建諸侯則侯國各祀其封內山川天子無預焉武

帝時諸侯或分或廢五嶽皆在天子之邦宣帝時
嶽瀆始有使者持節代祠之禮由魏及隋嶽鎮海
瀆皆即其地立祠命有司致祭唐宋之制有命本
界刺史縣令之祀有因郊祀而望祭之祀又有遣
祭之祀元遣使祭嶽鎮海瀆分東西南北中為五
道其天下山川之祀虞書望於山川徧於羣神周
頌曰懷柔百神周禮小宗伯兆山川邱陵墳衍各
因其方王制凡山川之小者其祭秩視伯子男劉

向謂山川能生物出雲雨施潤澤品類以百數故
視伯子男其在諸侯封內者諸侯又自祭之如楚
祭睢漳晉祭惡池齊祭配林是也秦罷封建則皆
領於祠官焉由漢唐以及宋元嶽鎮海瀆之外又
有其餘山川之祀不獨嶽瀆也城隍之祀莫詳所
始先儒謂既有社矣不應復有城隍故唐李陽冰
縉雲城隍記謂祀典無之惟吳越有之然成都城
隍祠太和中李德裕所建張說有祭城隍文杜牧

有祭黃州城隍文則不獨吳越為然又蕪湖城隍
建於吳赤烏二年高齊慕容儼梁武陵王祀城隍
神皆書於史又不獨唐而已宋以來其祀徧天下
或賜廟額或頒封爵至或遷就附會各指一人以
為神之姓名如鎮江慶元寧國太平華亭蕪湖等
郡邑皆以為紀信龍且賴充瑞吉建昌臨江南康
皆以為灌嬰是也張說祭荊州城隍文曰致和產
物助天育人張九齡祭洪州城隍方隅是保毗庶

是依則歷代崇祀之意有在也今國家開創之初
嘗以太歲風雲雷雨嶽鎮海瀆及天下山川京都
城隍及天下城隍皆祀於城南享祀之所既非專
祀又室而不壇非禮所宜考之唐制以立春後申
日祭雨雷於城東南以今觀之天地之生物動之
以風潤之以雨發之以雷陰陽之機本一氣使然
而各以時別祭甚失享祀本意至於海嶽之神其
氣亦流通暢達何有限隔今宜以太歲風雲雷雨

嶽鎮海瀆及天下山川城隍祇合為一壇春秋祀之從之

何孟春云國初肇祀太歲禮官雜議因及陰陽家說十二時所值之神太祖乃定祭太歲於山川壇之正殿而以春夏秋冬四月將分祀兩廡或謂月將非經見者按禮祭法埋少牢於泰昭祭時也相近於坎壇祭寒暑也太歲實統四時而月將四時之候寒暑行焉古人有時與寒暑之祭今祭太歲

月將則固時與寒暑之神也載諸祀典孰謂非經見耶至洪武七年甲寅令仲春秋上旬擇日祭未幾以諸神從祀南郊遂省春祭是年夏六月始正嶽鎮海瀆及各城隍等稱號惟孔子之封爵不改遂詔為制一五嶽之神稱東嶽泰山之神中嶽嵩山之神西嶽華山之神北嶽恒山之神南嶽衡山之神一五鎮稱東鎮沂山之神南鎮會稽山之神中鎮霍山之神西鎮吳山之神北鎮醫無閭山之

神一四海稱東海之神南海之神西海之神北海之神一四瀆稱東瀆大淮之神南瀆大江之神西瀆大河之神北瀆大濟之神一各處府州縣城隍稱某府城隍之神某州城隍之神某縣城隍之神一歷代忠臣烈士並依當時初封名爵祿某之神餘祠無功於民不應祀典者一切禁罷降詔云五嶽五鎮四海四瀆之封起自唐世崇名美謚歷代有加瀆祀不經莫此為甚至於忠臣烈士雖可加

封號亦惟當時為宜今依古定制凡嶽鎮海瀆並
去前代所封名號山水以山水本名稱其神郡縣
城隍神號一體改正歷代忠臣烈士亦依當時初
封以為實號後世謚封美稱皆與革去其孔子明
先王之要道為天下師以濟後世非有功一方一
時者比所有封爵仍因其舊遂為令未幾復降儀
注凡府州縣新官到任必先宿齋城隍廟謁神與
誓在陰陽表裏以安下民而祠祀之文禮儀之詳

備載大明集禮北嶽在今真定府定州曲陽縣漢
為常山郡上曲陽縣史記封禪書常山王有罪遷
天子封其弟于真定以續先王祀而以常山為郡
然後五嶽皆在天子之邦漢書郊祀志祠北嶽常
山於上曲陽後漢書章帝紀元和三年春二月戊
辰幸中山遣使者祠北嶽于上曲陽魏書和平元
年春正月如中山過恒嶽禮其神而返二年春二
月如中山遣使者祀恒嶽隋書大業四年秋八月

帝巡河北親祀恒岳唐書地理志定州曲陽縣元和十五年更恒岳曰鎮嶽設有嶽祠張嘉貞傳為定州刺史至州於恒嶽廟中立頌自為文書于石其碑用白石為之素質黑文甚為奇麗先是岳祠為遠近祈賽有錢數百萬嘉貞自以為頌文之功納其數萬自漢及唐北岳之祭皆在曲陽一統志乃謂恒山在渾源州南二十里山西志又謂宋時因山後諸州陷于契丹乃即曲陽致祭此謬說也

邱文莊濬云歷代東海南海皆臨海而祭西海北海則望祀在宋都汴梁無由至遼薊之域出國門而北望祭之可也今建都于燕望南而祭北海豈天子宅中以臨四海之義哉今京師東北乃古碣石淪海之地于此立祠而祭于勢為順于理為宜若夫中國之正西在于秦隴西南則蜀稍南則滇也滇之極西百夷之外聞有大海宜于此處望祀之今祭北海仍在懷慶祭西海仍在蒲州是邱之

說終明之世未用也

都城隍之神歲以五月十一日為神之誕辰及萬壽聖節各遣官致祭倪宗伯岳上疏云廟祀城隍之神本非人鬼安得誕辰可謂妄謬每歲南郊大祀壇八月山川壇俱有合祭之禮事體已重比於天下府縣之祭不同所有前項祭告煩瀆無據遂罷之

先農壇

先農壇在山川壇內西南隅永樂中建按洪武元年御史尋适請耕藉田享先農以勸天下上從之二年建壇壇南為藉田北為神倉歲親祭先農以后稷配已而又奉仁祖配八年令府尹祭不設配永樂建壇京師一如其制建于太歲壇傍之西南為制一成石包甃砌方廣四丈七尺高四尺五寸四出陛西為墜位東為齋宮鑾駕庫東北為神倉東南為具服殿殿前為觀耕臺用木方五丈高五尺南東西三出陛臺南為藉田護壇地六

百畝供黍稷及薦新品物又地九十四畝有奇每年額
稅四石七斗有奇太常寺會同禮部收貯神倉以備旱
潦又令壇官種一百九十畝壇戶二百六十六畝七分
上耕耤田親祭餘年順天府尹祭嘉靖中建圓廩方倉
以貯粟盛耕之日上具弁服詣壇躬祭如儀更翼善冠
黃袍各官吉服戶部尚書進耒耜順天府官進鞭上耒
耒耜三推三返部臣受耒耜府臣受鞭府官捧青箱隨
以種子播而覆之上御觀耕臺坐觀三公五推九卿九

推府官率庶人終畝

漢耕于鉅定于耒田于定陶于下邳無定所唐戒
近郊履千畝行九推宋耕數十步或十有二畦無
定數至明而其制始備

天子耕用亥日蓋亥之地直上天倉星又以建辰
月祭靈星以求豐穰靈星是天田星在于辰故農
字以辰

明宗伯蔣德璟藉田考

按藉字周禮作籍禮記作籍詩載芟小序亦作籍
說文作藉大明會典亦作藉周禮天官甸師掌師
其屬耕耨王籍以時入之以共齋盛註籍之言借
也月令孟春天子以元日祈穀于上帝乃擇元辰
天子親載耒耜帥三公九卿諸侯大夫躬耕帝籍
天子三推三公五推卿諸侯九推註元辰郊後吉
辰也帝籍者為天神借民力所治之田也籍田共
上帝粢盛故云為天神借民力也箋云籍之言借

也借民力治之正義云天子千畝諸侯百畝王一耕之而使庶人芸蓁終之是借民也王者役人自是常事而謂之借者言此田耕耨皆當王親為之但以聽政治民有所不暇故借人之力以為己功漢書孝文籍田應劭曰籍田千畝典籍之田臣瓚曰親耕親桑率天下先本不得以假借為稱然凡言典籍者謂作事設法書而記之或復追述前言號為典法此籍田在於公地歲歲耕墾何故以籍

為名若以事載典籍即名籍田則天下之事無非
籍矣何獨於此偏得籍名瓚親耕之文即云不得
假借豈籍田千畝天子親耕之乎周禮疏云籍田
之穀衆神皆用獨言帝籍者舉尊言之自天子三
推以下示有恭敬鬼神之法又示帥先天下故暫
時耕終之者庶人也說文曰籍帝籍千畝也古者
使民如借故謂之籍從耒昔聲通作籍韋昭曰借
民力治之以奉宗廟且以勸率天下使務農也盧

植曰藉耕也左傳邠人藉稻故知藉為耕瓚曰藉
謂蹈藉也師古曰瓚說是今會典作藉蓋本之說
文

考先農

詩載芟春藉田而祈社稷也正義曰周公成王太
平之時王者親耕藉田以勸農業又祈求社稷使
獲年豐歲稔故序本其多獲所繇經則主說年豐
不及藉社所以經序有異也月令孟春天子躬耕

帝籍仲春擇元日命民人社大司馬仲春蒐田獻禽以祭社然則天子祈社亦以仲春與耕藉異月而連言之者俱在春時故以春總之祭法云王為羣姓立社曰泰社王自為立社曰王社亦曰帝社此二社皆應以春祈之但此為百姓祈祭文當主於泰社其稷與社共祭亦當謂泰社泰稷焉鄭元謂王社在籍田之中按大明集禮云周官籥章凡國祈年于田祖吹豳雅擊土鼓以樂田畯鄭氏曰

田祖始耕田者謂神農也漢立官社文帝令官祠
先農晉武詔復二社北齊及隋又改曰先農唐神
龍中禮官祝欽明議以禮典無先農之文先農與
社本是一神妄為改作請改先農壇為帝社壇以
應禮經王社之義至開元定禮又採齊隋之議復
曰先農宋陳祥道曰先儒謂王社建於籍田然國
語王藉則司空除壇農正陳籍禮而歷代所祭先
農而已不聞祭社也詩曰春籍田而祈社非謂社

撥建于籍田也今按祝欽明云先農卽社陳祥道云社自社先農自先農籍田所祭乃先農非社也其說不同其為重農報本之義一也

考祭與耕同日

享先農之禮與躬耕同日禮無明文惟周語云農正陳籍禮而韋昭注謂陳籍禮者祭其神為農祈也至漢以籍田之日祀先農而其禮始著漢舊儀春耕籍田官祠先農百官皆從置籍田令丞東漢

籍田儀正月始耕常以乙日祠先農於田所先農
已享耕於其地自晉魏至唐宋其禮不廢政和間
罷享先農為中祀命有司行事止行親耕之禮南
渡後復親祠元不親行僅命有司攝事而已明高
皇帝親祠躬耕始復古禮後改中祀止遣應天府
官致祭不設配祭畢親耕惟登極初行耕藉禮則
親祭云

考不用亥

月令孟春擇元辰說者曰元辰祈穀郊後吉辰也
十二支謂之辰郊天是陽故用辛日耕藉是陰故
用亥辰知用亥者正月亥為天倉以其耕事故用
天倉也周語立春之日農祥晨正至二月初吉王
裸鬯而行籍禮漢文用亥日耕籍祠先農明帝耕
以二月章帝耕以正月乙日晉武帝以正月丁亥
宋文帝以正月上辛後吉亥齊武帝時王儉謂親
耕用立春後亥日經無明文何佟之云少牢饋食

禮禘太廟用丁亥鄭元以不必丁亥今若不得丁
則用己亥辛亥苟有亥焉可也梁天監中議書云
以殷仲春籍田理在建卯於是改用二月唐用孟
春吉亥宋用正月上辛後亥日政和中議禮局言
孟春親耕下太史局擇日不必專用吉亥元用孟
春吉亥國朝以仲春擇吉日行事

考壇制

號文公云籍田之制司空除于籍漢文帝立壇於

田所其制如社之壇宋於宮之震地八里外整治
千畝中開阡陌立先農壇於中阡西陌南梁移籍
田于建康北岸築兆域如南北郊齊作祠壇於陌
南阡西廣輪三十尺四陞三壝四門又為大營於
外唐高宗改籍田壇為先農壇神龍初復改先農
壇為帝社壇於壇西立帝稷壇禮同太社惟不備
方色有異焉壇高五尺方五丈四出陞其色青宋
先農壇九尺四十步飾以青二壝元壇制同社壇

縱廣十步高五尺四出陞其色青每方開櫺星門
國朝壇在耜田之北高五尺濶五丈四出陞

考耕所

唐貞觀中議籍田所在給事中孔穎達曰禮天子
籍於南郊諸侯於東郊晉武時於東南今於城東
不合古禮太宗曰禮緣人情何常之有虞書之平
秩東作已在東矣又乘青輅載黛耜者所以順於
春氣故知合在東方也於是遂定宋初耕於東郊

神宗元豐中議以天子為籍於南郊諸侯為籍於東郊是為不易之典而歷世帝王循用東郊之制乃依古禮度地於京城東南御耕位在先農壇遺門東南

考穀種

周官內宰上春詔王后帥六宮之人生種稑之種而獻之王先種後熟曰種後種先熟曰稑必使后宮藏種者以其有繁育之祥也必生而獻之者示

能育之使不傷敗且佐王耕事供祭祀也此項後
惟宋文帝時行之

考勞酒

周制耕籍畢反執爵於太寢三公九卿諸侯大夫
皆御命曰勞酒勞酒謂既耕而宴以勞羣臣也大
寢路寢御侍也周語虢文公曰耕畢膳夫陳享膳
宰監之膳夫贊王王歆太牢班賞之庶人終食此
禮唐宋皆行於還宮之次日或擇日賜宴明制耕

畢皇帝置酒于大次從耕大臣執事百官以及耆
老村社皆蒙賜焉弘治元年二月上親耕藉田禮
畢宴羣臣時教坊司以雜劇承應或出狎語左都
御史馬文升厲聲曰新天子當知稼穡艱難豈宜
以此瀆亂宸聽即去之

考大蜡

大蜡與藉田相為始終而本朝唯於此闕焉因請
當東作方興之始既舉藉田之禮以祀先農于春

而以帥先農民興其務本之心則百穀告成之後
載舉大蜡之禮以報先嗇於冬而以勞來農民報
其勤動之苦惜未行

崇禎壬午上親耕藉田紀今上御極之七年歲在
甲戌二月二十有七日親致祭於先農之神行躬
耕藉田禮至十五年壬午二月十九日上復親祭
先農行耕藉禮澤為戶科左給事中同科員張希
夏沈胤培左懋第沈迅戴明說導駕躬逢大典禮

紀其槩壬午二月十九日己未卯刻上駕至先農壇六科同禮部堂上官導駕至具服殿易皮弁服絳紗祭服至壇壇上結黃幄奉先農下設上拜位上拜揖甚恭禮畢仍導駕至具服殿易翼善冠黃袍太常寺奏請詣耕藉位六科同禮部導駕至位戶部尚書傅淑訓跪進耒耜順天府尹張宸極跪進鞭六科錦衣衛太常卿導引上左手耒右手執鞭三推步行犁土中盡隴而止耕時教坊司引

紅旗兩旁唱禾詞老人牽牛二人扶犁二人耕畢
戶部尚書跪受耒耜置犁亭府尹跪受鞭置鞭亭
府尹捧青箱播種耆老以御牛隨而覆之上御觀
耕臺於是大學士周延儒賀逢聖張四知謝陞陳
演吏部尚書李日宣六人耕東定國公徐允禎恭
順侯吳惟英清平伯吳遵周戶部尚書傅淑訓兵
部尚書陳新甲工部尚書劉遵憲六人耕西順天
府廳官各執箱播種太常卿奏耕畢駕至齋宮各

官一拜三叩頭分班侍立順天府官率兩縣官者
老人等五拜三叩頭農夫蓑衣挑農具三十人隨
後俯伏禮畢即隨府縣官至耕所終畝各官行慶
賀禮上傳旨賜酒飯文官三品以上武官二品以
上坐丹陛上餘在臺下是日科臣沈迅因教坊承
應歌詞俚俗宜改正上疏即下部本月二十四日
上令閣臣傳禮部王錫衮蔣德璟到閣諭以後耕
藉宜歌豳風無逸之詩其教坊所扮黃童白叟鼓

腹謳歌為佯醉狀委為俚俗斥令改正天地之舞
不宜扮天神褻瀆及禾詞宜頌不忘規須令詞臣
另行撰擬戶科左給事中臣某紀

旗纛廟

旗纛廟建于太歲殿之東永樂建規制如南京神曰旗
頭大將曰六纛大神曰五方旗神曰主宰戰船之神曰
金鼓角銃砲之神曰弓弩飛鎗飛石之神曰陣前陣後
神祇五猖等衆皆南向

旗謂牙旗黃帝出軍訣曰牙旗者將軍之精一軍之形候凡始豎牙必祭以剛日祭牙之日吉氣來應大勝之徵纛謂旄頭也太白陰經曰大將軍中營建之天子六軍故用六纛以旄牛尾為之在左駢馬首秦置頭騎以先驅漢武帝置靈旗為兵禱則太史奉以指所伐國孫權作黃龍火牙旗後齊天子親征建牙旗唐宋及元皆有旗纛之祭

旗纛藏內府仲秋遣旗手衛官祭于廟霜降祭于

教場歲暮祭于承天門外後罷霜降之祭又朔望
有神旗之祭則京營提督官專祭火雷之神于教
場國有大征討皇帝武弁服禡祭祭軍牙之神六
纛之神建牙旗六纛於神位後祭之日皇帝省牲
視滌牛一羊一豕一禮三獻奏樂皇帝飲福受胙
望燎刺五雄雞血於酒碗酬神焉

春明夢餘錄卷十五